

Na osnovu člana 68. stav 1. i 2. Zakona o vodama Federacije BiH („Službene novine FBiH“ br. 70/06), člana 42. Stav 2. Zakona o vodama Kantona Sarajevo („Službene novine KS“ br. 18/10), člana 13. stav 1. Pravilnika o načinu utvrđivanja uslova za određivanje zona sanitarne zaštite i zaštitnih mjera za izvorišta vode za javno vodosnabdijevanje stanovništva („Službene novine FBiH“ br. 88/12), i člana 88. Poslovnika Općinskog vijeća Hadžići („Službene novine Kantona Sarajevo“ b. 7/18), Općinsko vijeće Općine Hadžići, na 26. sjednici održanoj dana 30.04.2019. godine, donosi

ODLUKU O ZAŠTITI IZVORIŠTA VODE ZA PIĆE „CRNO VRELO“

I OPĆE ODREDBE

Član 1 (Predmet Odluke)

Ovom odlukom utvrđuju se zone sanitarne zaštite izvorišta vode za piće „Crno Vrelo“ na području Općine Hadžići (u daljem tekstu: Izvorište), sa kojeg se vrši vodosnabdijevanje vodom za piće potrošača na području Općine Hadžići, veličina i granice zona sanitarne zaštite, mjere zaštite, zabrane i ograničenja, monitoring kvaliteta i kvantiteta vode na izvorištu, izvor i način finansiranja zaštitnih mjera za planski period od 10 godina, nadzor nad provođenjem ove Odluke, kaznene odredbe i druga pitanja od interesa za provođenje sanitarne zaštite izvorišta.

Član 2 (Razlozi za donošenje Odluke)

- (1) Ova Odluka se donosi u cilju zaštite izvorišta „Crno Vrelo“ na teritoriji Općine Hadžići od svih vidova zagađenja i štetnih uticaja koji mogu nepovoljno djelovati na zdravstvenu ispravnost vode za piće ili na izdašnost izvorišta.
- (2) Ovom Odlukom utvrđuje se zaštita Izvorišta uspostavljanjem i održavanjem zona sanitarne zaštite i zaštitnih mjera, utvrđenih u skladu sa lokalnim uslovima, na osnovu provedenih istražnih radova, analiza i stručnog elaborata za zone sanitarne zaštite na području Općine Hadžići, a u cilju zaštite izvorišta iz kojeg se vrši eksploatacija vode za potrebe vodosnabdijevanja vodom za piće potrošača na području Općine Hadžići.

Član 3 (Izvorište)

- (1) Izvorište označava uži prostor gdje se iz vodnog tijela podzemnih voda ili iz vodnog tijela površinskih voda zahvata ili se planira zahvatati voda za ljudsku upotrebu.
- (2) Sliv Izvorišta „Crno Vrelo“ proteže se na teritoriji općine, Hadžići.

II ZONE SANITARNE ZAŠTITE I ZAŠTITNE MJERE

Član 4 (Vrsta izvorišta)

U skladu sa članom 7. Pravilnika o načinu utvrđivanja uslova za određenje zona sanitarne zaštite i zaštitnih mjera za izvorišta vode za javno vodosnabdijevanje stanovništva („Službene

novine FBiH“ br. 88/12) (u daljem tekstu: Pravilnika), Izvorište „Crno Vrelo“ predstavlja izvorište vode u kraškim akviferima.

Član 5 **(Uspostavljanje zone zaštite)**

Za izvorište „Crno Vrelo“, utvrđuju se sljedeće zone sanitarne zaštite:

I zona – zona sa najstrožijim zabranama i ograničenjima (zona izvorišta);

II zona – zona sa strogim zabranama i ograničenjima;

III zaštitna zona - zona sa umjerenim zabranama i ograničenjima.

III OBUHVAT I GRANICE ZAŠTITNIH ZONA

I - ZAŠTITNA ZONA – ZONA SA NAJSTROŽIJIM ZABRANAMA I OGRANIČENJIMA (ZONA IZVORIŠTA)

Član 6 **(Obuhvat i granice I zaštitne zone)**

(1) Područje I zaštitne zone izvorišta obuhvata neposredni prostor u radijusu od 10 metara oko navedenih vodozahvatnih objekata (kaptaza), kojim se vodozahvatni objekti štite od slučajnog ili namjernog zagađenja ili oštećenja.

(2) Granica I zaštitne zone određena je u skladu sa članom 7. stav 2. i 3. Pravilnika u kome je propisano da se granica I zaštitne zone može smanjiti na udaljenost ne manju od deset (10) metara, od vanjskih kontura vodozahvatnog područja.

(3) Ukupna površina I zaštitne zone iznosi 98,56 m².

(4) Općina Hadžići će u skladu sa važećim propisima o eksproprijaciji regulisati pitanje imovinsko-pravnih odnosa sa sadašnjim vlasnicima zemljišta na području I zaštitne zone. Zemljište I zaštitne zone je u vlasništvu J.K.P. „Komunalac“ d.o.o. Hadžići.

Član 7 **(Objekti na području I zaštitne zone)**

(1) Na području I zaštitne zone izvorišta vode za piće „Crno Vrelo“, na lokalitetu samog izvora se nalazi jedan kaptazni objekat.

(2) Pored postojećih objekata, iz stava 1. ovog člana, na području I zaštitne zone, mogu se, uz primjenu propisanih mjera zaštite u skladu sa Pravilnikom o načinu utvrđivanja uslova za određenje zona sanitarne zaštite i zaštitnih mjera za izvorišta vode za javno vodosnabdijevanje stanovništva („Službene novine FBiH“ br. 88/12), nalaziti i drugi vodoprivredni objekti, kao što su vodozahvatni objekti, postrojenje za prečišćavanje, rezervoari, pumpne stanice, trafo-stanice, administrativni objekti, kao i infrastrukturni i drugi objekti koji se koriste u svrhu obezbjeđenja javnog vodosnabdijevanja.

Član 8 **(Upravljanje objektima i provođenje mjera na području I zaštitne zone)**

(1) Vodnim i drugim objektima iz Člana 10. ove Odluke koji služe za vodosnabdijevanje vodom za piće potrošača na području Općine Hadžići, upravlja Javno komunalno preduzeće “Komunalac” d.o.o. Hadžići.

(2) Javno komunalno preduzeće “Komunalac” d.o.o. Hadžići nadležno je za provođenje svih zaštitnih mjera propisanih ovom Odlukom na području I zaštitne zone.

Član 9

(Zaštita, pristup i obilježavanje)

- (1) Područje I zaštitne zone mora biti zaštićeno od neovlaštenog pristupa ogradom, kao i drugim potrebnim mjerama osiguranja uz stalni elektronski i/ili fizički nadzor.
- (2) Ograda iz prethodnog stava ovoga člana mora biti izvedena na način da spriječi neovlašteni ili nasilni ulazak na područje I zaštitne zone.
- (3) Javno komunalno preduzeće "Komunalac" d.o.o. Hadžići je obavezno ograditi područje I zaštitne zone, na odgovarajući način obilježiti zaštitnu zonu, što naročito uključuje naziv izvorišta i zaštitne zone, naziv preduzeća, broj dežurnog telefona za hitne slučajeve i upozorenje o zabrani neovlaštenog pristupa.
- (4) Pristup na područje I zaštitne zone dozvoljen je samo ovlaštenim osobama, što uključuje zaposlenike Javnog komunalnog preduzeća "Komunalac" d.o.o. Hadžići koji stalno ili povremeno rade na objektima unutar ove zone i nadležnim inspeksijskim organima u toku vršenja redovnih ili vanrednih kontrola ove zone, kao i drugim licima uz posebno odobrenje i evidenciju Javnog komunalnog preduzeća "Komunalac" d.o.o. Hadžići, što se precizira općim aktom o održavanju i korištenju vodnih objekata iz člana 20. stav 4. Zakona o vodama FBiH.
- (5) Sva lica iz prethodnog stava ovoga člana moraju posjedovati odgovarajuće propusnice kako bi mogla pristupiti prostoru I zaštitne zone. Vrste propusnica i uslovi njihovog izdavanja utvrđuju su općim aktom Javnog komunalnog preduzeća "Komunalac" d.o.o. Hadžići iz prethodnog stava.
- (6) Lica koja stalno ili povremeno rade na objektima vodozahvata unutar I zaštitne zone moraju biti podvrgnuta periodičnim liječničkim pregledima, u skladu sa odgovarajućim propisima o sanitarnoj zaštiti.

Član 10

(Aktivnosti na području I zaštitne zone)

- (1) Na području I zaštitne zone izvorišta, zabranjuju se sve aktivnosti koje nisu u direktnoj vezi sa normalnim radom i održavanjem vodozahvatnih objekata. Aktivnosti koje se provode u cilju normalnog rada i održavanja vodozahvatnih objekata ne smiju štetno djelovati na Izvorište.
- (2) Izuzetno od odredaba stava 1. ovoga člana, dozvoljavaju se, a u skladu sa Prilogom 1. Pravilnika o načinu utvrđivanja uslova za određenje zona sanitarne zaštite i zaštitnih mjera za izvorišta vode za javno vodosnabdijevanje stanovništva („Službene novine FBiH“ br. 88/12), sljedeće aktivnosti uz standardne mjere zaštite:
 - Izgradnja kanalizacije i drugih infrastrukturnih instalacija koje omogućuju redovno funkcionisanje objekata vodozahvatnog područja;
 - Prirodni uzgoj trave, pri čemu nije dozvoljena upotreba đubriva i drugih agrotehničkih sredstava.

II - ZAŠTITNA ZONA - ZONA SA STROGIM ZABRANAMA I OGRANIČENJIMA

Član 11

(Obuhvat i granice II zaštitne zone)

- (1) Uspostavlja se II zaštitna zona području izvorišta „Crno Vrelo“.
- (2) Granica II zaštitne zone izvorišta „Crno Vrelo“ obuhvata prostor od vanjske granice I zaštitne zone do linije od koje je podzemnoj vodi potrebno najmanje jedan (1) dan tečenja do vodozahvata, sukladno članu 7. stav 6. Pravilnika.
- (3) Površina II zaštitne zone na području izvorišta „Crno Vrelo“ iznosi 6,89 ha.
- (4) Područje II zaštitne zone izvorišta Crno Vrelo obuhvata prostor od vanjske granice I zaštitne zone do vanjske granice II zaštitne zone, koja se proteže od vodozahvata na izvorištu duž granice hidrogeološkog sliva u pravcu sjeverozapada paralelno sa potokom Košutin do

granice sa III trećom zaštitnom zonom u dužini od cca 350 m, odakle dalje nastavlja duž granice sa trećom zonom u pravcu sjeveroistoka na dužini od oko 250 m. Dalje se granica pruža u pravcu jugoistoka na dužini od oko 400 m, a potom vodi u pravcu jugozapada u dužini oko 150 m do kaptaze na koti 710 m n.m., gdje se i završava.

Član 12

(Aktivnosti na području II zaštitne zone)

Na području II zaštitne zone Izvorišta za sve aktivnosti, propisuju se nivoi ograničenja i zabrane za II zaštitnu zonu, a u skladu sa Prilogom 1. Pravilnika o načinu utvrđivanja uslova za određivanje zona sanitarne zaštite i zaštitnih mjera za izvorišta vode za javno vodosnabdijevanje stanovništva („Službene novine F BiH“ br. 88/12).

Zabranjuje se:

- Izgradnja novih urbanih naselja
- Proširenje postojećih urbanih naselja
- Individualna stambena izgradnja uz korištenje samostalnih sistema za tretman otpadnih voda (npr. septičke jame)
- Izvođenje ili obavljanje bilo kakvih aktivnosti koje izazivaju ili pospješuju eroziju tla
- Iskopi u vodonosnom sloju
- Vađenje materijala iz vodotoka
- Izgradnja i rad kamenoloma i drugih pozajmišta materijala
- Minerski i drugi građevinski radovi koji nisu u funkciji vodosnabdijevanja, a koji mogu poremetiti kompoziciju vodonosnih slojeva
- Izvođenje istražnih radova za, mineralne vode, kao i druge materije koje mogu ugroziti kvalitet vode na izvorištu
- Transformatorske stanice
- Manevarski i vojni poligoni
- Izgradnja novih, korištenje ili proširenje postojećih groblja
- Ispuštanje nepročišćenih urbanih otpadnih voda
- Izgradnja i rad postrojenja za tretman urbanih otpadnih voda
- Odlaganje bilo kakvog čvrstog, građevinskog, komunalnog i drugog otpada
- Izgradnja i rad sanitarnih deponija
- Izgradnja i rad postrojenja za tretman mulja u sastavu postrojenja za tretman otpadnih voda
- Izgradnja i rad postrojenja za tretman životinjskog otpada
- Podzemna eksploatacija mineralnih sirovina, izgradnja i rad objekata za deponovanje, mljevenje i preradu sirovina i jalovine
- Površinska eksploatacija mineralnih sirovina, izgradnja i rad objekata za deponovanje, mljevenje i preradu sirovina i jalovine
- Izvođenje istražnih i eksploatacionih bušotina za naftu i zemni gas
- Izvođenje istražnih radova i eksploatacija radioaktivnih tvari
- Pogoni metalne industrije
- Pogoni hemijske industrije
- Pogoni gumarske industrije
- Pogoni industrije papira i celuloze
- Pogoni kožarske industrije
- Pogoni prehrambene industrije
- Gasne elektrane
- Termo elektrane
- Nuklearne elektrane

- Skladištenje svih industrijskih sirovina i hemikalija opasnih za vodu
- Skladištenje i deponovanje radio-aktivnih tvari i otpada
- Skladištenje i deponovanje šljake i pepela
- Deponije industrijskog otpada opasnog za kvalitete vode na izvorištu
- Izgradnja i rad industrijskih kanalizacionih sistema
- Izgradnja i rad postrojenja za tretman industrijskih otpadnih voda
- Ispuštanje ili akumuliranje neprečišćenih industrijskih otpadnih i rashladnih voda
- Izgradnja autocesta i cesta rezervisanih za motorni saobraćaj
- Izgradnja depoa za teška vozila
- Izgradnja i rad autobusnih stanica i terminala
- Izgradnja željezničkih pruga, ranžiranih stanica i terminala
- Izgradnja i rad aerodroma ili poletno –sletnih staza za korištenje u zračnom saobraćaju
- Izgradnja i rad cjevovoda za transport tekućina opasnih za kvalitet vode
- Cestovni transport hemikalija, tečnih goriva i drugih opasnih materija
- Izgradnja nadzemnih ili podzemnih spremnika
- Izgradnja pretakališta
- Izgradnja benzinskih stanica uz prometnice
- Skladištenje ograničenih količina lož ulja ili pogonskog goriva za poljoprivredne strojeve za potrebe individualnih domaćinstava
- Intenzivna stočarska i peradarska proizvodnja
- Deponovanje čvrstog ili tečnog stajnjaka za pojedinačna domaćinstva
- Intenzivna ispaša stoke
- Napajanje stoke iz površinskih vodotoka
- Skladištenje đubriva i pesticida
- Poljoprivredna proizvodnja praćena intenzivnim korištenjem vještačkih đubriva, stajnjaka, pesticida, herbicida i insekticida
- Navodnjavanje prečišćenim otpadnim vodama
- Nekontrolisana sječa i krčenje šume
- Korištenje plovnih sredstava sa motorima sa unutrašnjim sagorijevanjem

Uz standardne i dodatne mjere zaštite dozvoljeno je:

- Održavanje postojećih građevinskih objekata bez promjene namjene
- Izgradnja urbanih prometnica i pripadajućih objekata (parkirališta, mostova, tunela,...)
- Stočarska i peradarska proizvodnja za vlastite potrebe pojedinačnih domaćinstava, do 10 grla krupne stoke
- Izgradnja i rad sportsko-rekreativnih i banjsko-lječilišnih objekata
- Kampovanje ili drugi vid organizovanog okupljanja ljudi u prirodi
- Izgradnja i rad otvorenih sportskih terena
- Izgradnja i rad igrališta za golf
- Izgradnja i rad skijališta

Uz standardne mjere zaštite dozvoljeno je:

- Deponije industrijskog otpada bezopasnog za kvalitete vode na izvorištu
- Poljoprivredna proizvodnja zdrave hrane bez korištenja vještačkih đubriva, stajnjaka, pesticida, herbicida i insekticida
- Prirodni uzgoj trave bez upotrebe đubriva i drugih agrotehničkih sredstava
- Kontrolisana sječa i krčenje šume
- Turističke aktivnosti (splavarenje, rafting, ...)
- Rekreativni i sportski ribolov

Za sve ostale aktivnosti zabrane i nivo ograničenja njihove primjene važe u skladu sa Prilogom 1. Pravilnika o načinu utvrđivanja uslova za određivanje zona sanitarne zaštite i zaštitnih mjera za izvorišta vode za javno vodosnabdijevanje stanovništva („Službene novine FBiH“ br. 88/12).

III - ZAŠTITNA ZONA - ZONA SA UMJERENIM ZABRANAMA I OGRANIČENJIMA

Član 13

(Obuhvat i granice III zaštitne zone)

- (1) Uspostavlja se III zaštitna zona području izvorišta „Crno Vrelo“.
- (2) Sukladno Pravilniku III zaštitna zona izvorišta „Crno Vrelo“ obuhvata prostor od vanjske granice II zaštitne zone do linije od koje je podzemnoj vodi potrebno najmanje deset (10) dana tečenja do odozavhata. Obzirom da bi na ovaj način definirano područje III Zaštitne zone dvostruko prevazilazilo površinu hidrogeološkog sliva, definira se da područje III zaštitne zone obuhvata dio ukupnog hidrogeološkog sliva izvorišta „Crno Vrelo“ koje se nalazi izvan područja I i II zaštitne zone. Treća zaštitna zona se pruža sjeverozapadno od granice druge zaštitne zone na dužini od oko 400 m do mjesta Mrkajin Stan, na koti 770 m n.m., odakle nastavlja sjeverno u dužini od oko 500 m do mjesta Grab. Dalje granica se spušta jugoistočno do sjeverozapadne granice II zaštitne zone dužine od oko 800 m, te dalje ide granicom druge zone na dužini cca 250 m, gdje se i završava.
- (3) Površina III zaštitne zone na području izvorišta „Crno Vrelo“ iznosi 20,70 ha.
- (4) Vanjska granica slivnog područja izvorišta „Crno Vrelo“, koja predstavlja vanjsku granicu III zaštitne zone, utvrđena je hidrogeološkim istražnim radovima. Ova granica omeđuje prostor koji čini hidrogeološko slivno područje.

Član 14

(Aktivnosti na području III zaštitne zone)

Na području III zaštitne zone izvorišta „Crno Vrelo“ za sve aktivnosti se propisuju nivoi ograničenja i zabrana u skladu sa Prilogom 1. Pravilnika o načinu utvrđivanja uslova za određenje zona sanitarne zaštite i zaštitnih mjera za izvorišta vode za javno vodosnabdijevanje stanovništva („Službene novine FBiH“ br. 88/12)

Zabranjeno je:

- Iskopi u vodonosnom sloju
- Izgradnja i rad kamenoloma i drugih pozajmišta materijala
- Minerski i drugi građevinski radovi koji nisu u funkciji vodosnabdijevanja, a koji mogu poremetiti kompoziciju vodonosnih slojeva
- Manevarski i vojni poligoni
- Ispuštanje nepročišćenih urbanih otpadnih voda
- Odlaganje bilo kakvog čvrstog, građevinskog, komunalnog i drugog otpad
- Izgradnja i rad sanitarnih deponija
- Izvođenje istražnih i eksploatacionih bušotina za naftu i zemni gas
- Izvođenje istražnih radova i eksploatacija radioaktivnih tvari
- Rafinerije
- Pogoni hemijske industrije
- Nuklearne elektrane
- Skladištenje industrijskih sirovina i hemikalija opasnih za vodu
- Skladištenje i deponovanje radio-aktivnih tvari i otpada
- Deponije industrijskog otpada opasnog za kvalitete vode na izvorištu

- Ispuštanje ili akumuliranje neprečišćenih industrijskih otpadnih i rashladnih voda
- Izgradnja depoa za teška vozila
- Izgradnja i rad aerodroma ili poletno-sletnih staza za korištenje u zračnom saobraćaju
- Izgradnja i rad cjevovoda za transport tekućina opasnih za kvalitet vode
- Nadzemni ili podzemni spremnici
- Pretakališta
- Skladištenje đubriva i pesticida
- Poljoprivredna proizvodnja praćena intenzivnim korištenjem vještačkih đubriva, stajnjaka, pesticide, herbicida i insekticida
- Navodnjavanje prečišćenim otpadnim vodama
- Nekontrolisana sječa i krčenje šume

Dopušteno je uz standardne i dodatne mjere zaštite:

- Izgradnja novih urbanih naselja
- Proširenje postojećih urbanih naselja
- Individualna stambena izgradnja uz korištenje samostalnih sistema za tretman otpadnih voda (npr. septičke jame)
- Izvođenje ili obavljanje bilo kakvih aktivnosti koje izazivaju ili pospješuju eroziju tla
- Vađenje materijala iz vodotoka
- Izvođenje istražnih radova za naftu, mineralne vode, zemni plin kao i druge materije koje mogu ugroziti kvalitet vode na izvorištu
- Transformatorske stanice
- Izgradnja novih, korištenje ili proširenje postojećih groblja
- Izgradnja i rad postrojenja za tretman urbanih otpadnih voda
- Izgradnja i rad postrojenja za tretman mulja u sastavu postrojenja za tretman otpadnih voda
- Izgradnja i rad postrojenja za tretman životinjskog otpada
- Podzemna eksploatacija mineralnih sirovina, izgradnja i rad objekata za deponovanje, mljevenje i preradu sirovina i jalovine
- Površinska eksploatacija mineralnih sirovina, izgradnja i rad objekata za deponovanje, mljevenje i preradu sirovina i jalovine
- Pogoni metalne industrije
- Pogoni gumarske industrije
- Pogoni industrije papira i celuloze
- Pogoni kožarske industrije
- Pogoni prehrambene industrije
- Gasne elektrane
- Termo elektrane
- Skladištenje i deponovanje šljake i pepela
- Izgradnja i rad industrijskih kanalizacionih sistema
- Izgradnja i rad postrojenja za tretman industrijskih otpadnih voda
- Izgradnja autocesta i cesta rezervisanih za motorni saobraćaj
- Izgradnja urbanih prometnica i pripadajućih objekata (parkirališta, mostova, tunela, ...)
- Izgradnja i rad autobusnih stanica i terminala
- Izgradnja željezničkih pruga, ranžirnih stanica i terminala
- Cestovni transport hemikalija, tečnih goriva i drugih opasnih materija
- Benzinske stanice uz prometnice
- Skladištenje ograničenih količina lož ulja ili pogonskog goriva za poljoprivredne strojeve za potrebe individualnih domaćinstava

- Intenzivna stočarska i peradarska proizvodnja
- Stočarska i peradarska proizvodnja za vlastite potrebe pojedinačnih domaćinstava
- Deponovanje čvrstog ili tečnog stajnjaka za pojedinačna domaćinstva
- Intenzivna ispaša stoke
- Napajanje stoke iz površinskih vodotoka
- Izgradnja i rad sportsko-rekreacionih i banjsko-lječilišnih objekata
- Kampovanje ili drugi vid organizovanog okupljanja ljudi u prirodi
- Izgradnja i rad otvorenih sportskih terena
- Izgradnja i rad igrališta za golf
- Izgradnja i rad skijališta

Dopušteno je uz standardne mjere zaštite:

- Održavanje postojećih građevinskih objekata bez promjene namjene
- Deponije industrijskog otpada bezopasnog za kvalitet vode na izvoru
- Poljoprivredna proizvodnja zdrave hrane bez korištenja vještačkih đubriva, stajnjaka, pesticida, herbicida i insekticida
- Prirodni uzgoj trave bez upotrebe đubriva i drugih agroteh. sredstava
- Kontrolisana sječa i krčenje šuma
- Turističke aktivnosti
- Rekreacioni i sportski ribolov

Za sve ostale aktivnosti zabrane i nivo ograničenja njihove primjene važe u skladu sa Prilogom 1. Pravilnika o načinu utvrđivanja uslova za određivanje zona sanitarne zaštite i zaštitnih mjera za izvorišta vode za javno vodosnabdijevanje stanovništva („Službene novine FBiH“ br. 88/12).

IV NAZIV ORGANA I PRAVNIH LICA NADLEŽNIH ZA SPROVOĐENJE ODLUKE

Član 15

(Nadležni organi)

Organi nadležni za provođenje ove Odluke su Općina Hadžići i to u skladu članom 6. stav 4. i Javno komunalno preduzeće “Komunalac” d.o.o. Hadžići u skladu sa članom 8. stav 1. i 2., te, članom 9. stav 3., 4. i 5. ove Odluke.

V MJERE ZAŠTITE

Član 16

(Provođenje mjera zaštite u I zaštitnoj zoni)

Aktivnosti na provođenju mjera zaštite u I zaštitnoj zoni Izvorišta „Crno Vrelo“ provoditi će Javno komunalno preduzeće “Komunalac” d.o.o. Hadžići.

Član 17

(Monitoring)

Monitoring kvantiteta i kvaliteta vode na izvoru unutar I zona sanitarne zaštite izvorišta „Crno Vrelo“ provoditi će Javno komunalno preduzeće “Komunalac” d.o.o. Hadžići, te na taj način osigurati stalni i sistematski pregled vode, te poduzimati mjere za osiguranje zdravstvene ispravnosti vode za piće.

VI IZVORI I NAČIN FINANSIRANJA

Član 18

(Finansiranje provođenja mjera zaštite)

Finansiranje provođenja mjera zaštite u I zaštitnoj zoni izvorišta „Crno Vrelo“ u Hadžićima vršiti će Operator vodovodnog sistema, odnosno Javno komunalno preduzeće “Komunalac” d.o.o. Hadžići.

VII NADZOR NAD PROVOĐENJEM ODLUKE

Član 19

(Nadzor)

(1) Upravni nadzor nad provođenjem ove Odluke vrši nadležni organ Kantona Sarajevo i Općine Hadžići.

(2) Inspekcijski nadzor nad provođenjem ove Odluke odnosno nad provođenjem režima i mjera zaštite

propisanih ovom Odlukom vrše kantonalni i općinski inspekcijski organi u skladu sa važećim zakonskim propisima.

VIII KAZNENE ODREDBE

Član 20

Novčanom kaznom od 1.000 do 5.000 KM kazniće se za prekršaj pravno lice:

11. ako vrši izvođenje radova, izgradnju ili rekonstrukciju objekata ili obavlja aktivnosti protivno zaštitnim mjerama propisanim ovom Odlukom;

12. ako ne postupi u skladu sa članom 12. i 14. ove Odluke;

Za prekršaj iz stava 1. ovoga člana kaznit će se i odgovorno lice u pravnom licu novčanom kaznom u iznosu od 100 do 1.000 KM.

Član 21

Pravno i odgovorno lice u pravnom licu kaznit će se za privredni prestup iz člana 204. stav 1., tačka 10. i član 206. stav 1., tačka 15., Zakona o vodama FBiH („Službene novine Federacije BiH“ br. 70/06).

Član 22

Novčanom kaznom od 100 do 500 KM kazniće se za prekršaj fizičko lice:

ako vrši izvođenje radova, izgradnju ili rekonstrukciju objekata ili obavlja aktivnosti protivno zaštitnim mjerama propisanim ovom Odlukom.

IX PRELAZNE I ZAVRŠNE ODREDBE

Član 23

Urbanističko uređenje prostora, građenje, privredne, poljoprivredne i druge djelatnosti mogu se vršiti samo na način i u mjeri koji su utvrđeni ovom Odlukom. Privredna društva, federalni, kantonalni i općinski organi uprave, druga pravna lica i građani dužni su pridržavati se odredbi ove Odluke i primjenjivati propisane mjere zaštite.

Član 24

Sastavni dio ove Odluke je grafički prilog na kome su prikazane granice zona sanitarne zaštite izvorišta.

Član 25

Sastavni dio ove Odluke je Prilog 1. Izvori i način finansiranja provođenja zaštitnih mjera za planski period od 10 godina, kao i izvor i način finansiranja provođenja zaštitnih mjera koje će se provoditi kontinuirano za cijelo vrijeme rada Izvorišta.

Član 26

(Uređenje prostora)

Na područjima I zaštitne zone izvršit će se uređenje prostora i provođenje zaštitnih mjera u skladu sa ovom Odlukom i projektom zaštite u roku od dvije godine od dana njenog donošenja (stupanja na snagu).

Član 27

(Provođenje radnji i primjena Odluke)

Općina Hadžići dužna je izvršiti radnje iz člana 6. stav 4. ove Odluke u roku od šest mjeseci od dana njenog donošenja. Javno komunalno preduzeće "Komunalac" d.o.o. Hadžići, dužno je izvršiti radnje iz člana 8. i 9. ove Odluke u roku od šest mjeseci od dana njenog donošenja. Javno komunalno preduzeće "Komunalac" d.o.o. Hadžići i druga pravna i fizička lica, dužni su pridržavati se odredaba ove Odluke i primjenjivati iste.

Član 28

(Obaveza usklađivanja sa odredbama Odluke)

Donosioci planskih dokumenata (prostorni plan, planovi upravljanja vodama, šumsko-privredna osnova) dužni su iste uskladiti sa odredbama ove Odluke u roku od 6 mjeseci od dana njenog donošenja.

Član 29

Stupanjem na snagu ove Odluke, prestaje da važi Odluka o zaštiti izvorišta vode za piće „Crno vrelo“ broj: 01-01-2-3702/15 od 30.04.2015. godine.

Član 30



(Stupanje na snagu)

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

Broj: 19.
Hadžići, 30.04.2019. godine

Predsjedavajući
Općinskog vijeća Hadžići

Adi Kalem




Legenda


Zone Zaštite


- Prva zona zaštite
- Druga zona zaštite
- Treća zona zaštite
- Četvrta zona zaštite

NARUČILAC: Javno komunalno preduzeće "Komunalac" d.o.o. Hadžići		BROJ UGOVORA: UP-02-851/14	
		11.06.2014. god.	
DATUM IZRADE: Januar 2015. godine	ODGOVORNI PROJEKTANT: Mr. Dalila Jabučar, dipl. inž. građ.	OBRADIVAČ: Dino Delibašić, dipl. inž. građ.	
PROJEKTANT: INSTITUT ZA HIDROTEHNIKU GRAĐEVINSKOG FAKULTETA U SARAJEVU			
PROJEKT: Doprojektovanje projektne dokumentacije zaštite izvorišta na vodovodnim sistemima na području općine Hadžići			
NAZIV PRILOGA: KARTA ZAŠTITNIH ZONA IZVORIŠTA CRNO VRELO			
MJERILO: 1:5 000	ŠIFRA: D-1166	PRILOG BROJ: 4.5.	LIST OD: 1 1



Legenda

 Prva zona zaštite

NARUČILAC: Javno komunalno preduzeće "Komunalac" d.o.o. Hadžići		BROJ UGOVORA: UP-02-851/14	
		11.06.2014. god.	
DATUM IZRADE:	ODGOVORNI PROJEKTANT:	OBRADIVAČ:	
Januar 2015. godine	Mr. Dalila Jabučar, dipl. inž. grad.	Dino Delibaščić, dipl. inž. grad.	
			
PROJEKTANT: INSTITUT ZA HIDROTEHNIKU GRAĐEVINSKOG FAKULTETA U SARAJEVU			
PROJEKT: Doprojektovanje projektne dokumentacije zaštite izvorišta na vodovodnim sistemima na području općine Hadžići			
NAZIV PRILOGA: KARTA PRVE ZAŠTITNE ZONE IZVORIŠTA CRNO VRELO			
MJERILO:	ŠIFRA:	PRILOG BROJ:	LIST OD
1:2 500	D-1166	4.10.	1 1